

मॉर्निंग डोगरी न्यूज़ बुलेटिन, समें. 09.20 Hrs

<><><><><><>

एह आकाशवाणी जम्मू ऐ, बडलै खबरें च तुंदा सुआगत, पैहले खास-खास खबरें कन्नै श्रुति खजूरिया।

Headlines

1. मॉरिशियस नै प्रधानमंत्री नरेन्द्र मोदी होरेंगी अपने सब्भनै शा बड्डे नागरिक अवार्ड कन्नै सम्मानित कीता ऐ।
2. जम्मू-कश्मीर सरकारै हल्का विकास फंड आहली योजना दे तैहत विधानसभा दे हर इक सदस्य लेई सलाना 3 करोड़ रुपें दी रकम बागुजार करने दा फैसला लैता ऐ।
3. केन्द्र सरकारै, गैर-कनूनी गतिविधिएं दी रोकथाम सरबन्धी कनून तैहत अवामी एक्शन कमेटी, जेके-आईएम पर 5एं बरें लेई बंदिश लाई दिती ऐ। गृह मंत्री होरें आखेआ ऐ जे राष्ट्र बरोधी गतिविधिएं च मुलव्वज पाए जाने आहलें सख्त कार्रवाई कीती जाहग।
4. जम्मू-कश्मीर पुलसा दे डरैक्टर जनरल नलिन प्रभात होरें बन्ने आहले जिले पुंछ दा दौरा लाइयै सुरक्षा सरबन्धी तैयारिएं दा जायजा लैता।

<><><><><><>

PM-Mauritius Award

प्रधानमंत्री नरेंद्र मोदी होर मारीशस दे सर्वोच्च नागरिक सम्मान “Grand of the order of the staar” ते “Key of the Indian Ocean” कन्नै सम्मानित होने आहले पैहले भारतीय बनी गेन। मारीशस दे प्रधानमंत्री होरें कल संझा भारती प्रवासियें दे इक कार्यक्रम दौरान प्रधानमंत्री मोदी होरें गी सम्मान प्रदान करने दी घोषणा कीती ही। एह मोदी होरें गी थहोने आहला इस चाल्ली दा 21मां सम्मान ऐ। प्रधानमंत्री मोदी होरें भारतीय समुदाय

गी संबोधित करदे होई देश दे सर्वोच्च नागरिक सम्मान कन्नै सम्मानित होने पर मारीशस दे लोकें ते सरकार गी धन्नवाद कीता। प्रधानमंत्री होरें आखेआ जे मारीशस छड़ा इक सांझ भ्याल मुख्य गै नेई ऐ, सगुआं भारत दे परोआर दा इक हिस्सा ऐ। प्रधानमंत्री नरेंद्र मोदी होर अज्ज मारीशस दे राश्ट्रीय दिवस समारोह च मुख अतिथि होंगन।

<><><><><><>

CD-Fund

जम्मू-कश्मीर सरकारै हल्का विकास फंड आहली योजना - सीडीएफ दे तैहत विधानसभा दे हर इक सदस्य लेई सलाना 3 करोड़ रुपें दी रकम बागुजार करने दा फैसला लैता ऐ। आकाशवाणी दे जम्मू संवाददाता दी रिपोर्ट मूजब, इस फैसले कन्नै विधायक, अपने हलकें च महत्वपूर्ण विकास परियोजनाएं दी सफारश दी दिक्ख-सुन करी सकडन। खजाना मैहकमे नै इस योजना दी अमल-आवरी लेई ब्यौरेवार दिशा-निर्देश जारी करी दिते न। इ'नें हिदायतें मूजब, हर इक विधायक, अपने हलके च सलाना 3 करोड़ रुपें तगर दे विकास कम्में दी सफारश सरबंधत जिला विकास कमिशनर गी करी सकोग। एहदे अलावा विधानसभा च खास तौर उप्पर नामजद कीते गेदे विधायकें कश एह अख्तियार होडन जे ओह केन्द्र शासित प्रदेश दे कुसै बी हिस्से च परियोजनाएं दी सफारश करी सकडन। इस योजना तैहत चलाए जाने आहले प्रोजेक्ट इक ब'रे दे अंदर-अंदर मुकम्मल होने लोइचदे न। इ'नें परियोजनाएं दे तैहत सिड़कें दा निर्माण, सिंचाई सुविधाएं च बाद्दा, बिजली सरबन्धी ढांचे आहले कम्में, गरीब ते दबोए-लतड़ोए दे लोकें लेई घरें-मकानें दा दर्जा बधाने सरबन्धी कम्में गी तोढ़ चाढ़ने च मदाद थहोग।

<><><><><><>

Graduates-Passed

जम्मू-कश्मीर सरकारै आखेआ ऐ जे पिच्छले द'ऊं ब'रें दे दरान प्रदेश च तकरीबन 50 जहार बच्चे गैजुएट होए न जिसलै के इस्सै अवधि दरान जम्मू-कश्मीर पब्लिक सर्विस कमिशनर ते जेकेएसएसबी आसेआ तकरीबन 11

जहार भर्थियां कीतीआं गेइयां न। आकाशवाणी दे जम्मू संवाददाता दी रिपोर्ट मूजब, विधायक चंद्र प्रकाश गंगा हुंदे आसेआ पुच्छे गेदे इक सोआलै दे परते च सरबंधत मंत्री होरें दस्सेआ जे बरें 2023 च 25 जहार 425 बच्चे ग्रैजुएट होए जिसलै के जेके-पीएससी ते जेके-एसएसबी आसेआ 2 जहार 175 नियुक्तियां कीतीआं गेइयां। इससै चाल्ली बरें 2024 च 23 जहार 926 बच्चे ग्रैजुएट होए ते जेके-पीएससी ते जेके-एसएसबी नै इस दरान 9 जहार 351 नियुक्तियां कीतीआं। तोआई निजी खेतर तैहत औद्योगिक खेतर च 2022-23 च 15 जहार 719 लोकें गी रोजगार थोआ जिसलै के 2023-24 च 29 जहार 9 सौ 69 लोकें गी रोजगार हासल होआ। मंत्री होरें दस्सेआ जे मुमकिन, तेजस्विनी, प्रधानमंत्री रोजगार सृजन कार्यक्रम ते आर.ई.जी.पी. ज्नेई योजनाएं दे तैहत कम्म-रोजगार दे 9 लख 58 जहार शा मते मौके पैदा कीते गे न। मंत्री होरें इब्बी दस्सेआ जे एमजी-नरेगा दे तैहत जनवरी 2025 तोहड़ी 3 करोड़ 1 लख ध्याड़िएं दा कम्म पैदा कीता गेआ ते एहदे राहें 8 लख 7 जहार शा मते लोकें गी रोजगार हासल होआ।

<><><><><><>

Div Com Jammu

जम्मू दे डिवीजनल कमिशनर रमेश कुमार होरें जम्मू युनिवर्सिटी दे जर्नलिज़म ते मीडिया स्टडीज़ विभाग आसेआ इंदिरा गांधी नेशनल सेंटर फॉर आर्ट्स दे सैहयोग कन्नै आयोजित कीते गेदे शक्ति पर्व कार्यक्रम च कल हिस्सा लैता। इस मौके उप्पर महिला नेताएं ते बक्ख-बक्ख खेतरें च टकोहदी उपलब्धियां हासल करने आहली महिलाएं गी सम्मानित कीता गेआ। कार्यक्रम दरान डिवीजनल कमिशनर होरें समाज च फर्कोफर्की करी महिलाएं गी पेश औने आहली चुनौतिएं पर लोऽ पाई ते आखेआ जे महिलाएं गी पिच्छे धक्कने आहली रूढ़ीवादी सोच गी खत्म करना लोड़चदा ऐ। उंनै आखेआ जे महिलाएं दा सशक्तिकरण छड़ा कोई इक ध्याड़े दा कम्म ग नेई ऐ सगुआं एहदे लेई समाज च लगातार जतन ते कार्रवाईयां कीतीआं जानियां लोड़चदिआं न।

<><><><><><>

Satwari-Flyover

जम्मू शैहा च गांधी नगर लास्ट मोड़ थमां सतवारी चौक तगर फलाईओवर दा कम्म शुरु होने दे मद्देनजर ट्रैफिक पुलसै इस रस्तेया औने-जाने आहली गड्डिएं लेई विशेष इतलाह जारी कीती ऐ। एहदे मूजब, कुंजवानी, गंग्याल आहले रस्तेया सांबा ते कठुआ थमां जम्मू शैहा बक्खी औने आहली सब्भनें गड्डिएं गी सतवारी चौक थमां एम.एच. अस्पताल सिड़क - बेली चराना - चौथे तवी पुल - एशिया क्रासिंग ते कनाल हैड थमां हुंदे होई अपनी तय थाहें तोहड़ी पुज्जना पौंग। इस्सै चाल्ली दी बवस्था, आर.एस. पुरा, मीरां साहिब ते आले-दोआले दे इलाकें थमां जम्मू शैहा बक्खी औने आहली गड्डिएं लेई बी लागू होग। ऊआं बिक्रम चौक थमां सतवारी चौक तोहड़ी जाने आहली गड्डिएं लेई 'वन-वे' यानि छड़ा इक्कै बक्खी दा जाने दी गै खुल्ल होग ते गांधी नगर लास्ट मोड़ थमां अग्गे इ'नें गड्डिएं गी सतवारी चौक तोहड़ी छड़ा मुख सिड़क दे सज्जे पाससै दा गै सफर करने दी इजाजत होग। इस सरबंथे च होर मती जानकारी लेई लोक, ट्रैफिक कन्ट्रोल युनिट जम्मू कन्ने इ'नें नम्बरें पर राबता करी सकदे न। नम्बर न :- 0191-2459048 ते 94191-47732

<><><><><><>

Ramban-Food

खाद्य सुरक्षा मैहकमा रामबन लगातार जत्न करा रदा ऐ खरी ते म्यारी उत्पादन आहली तकनीकें गी अपनाने ते साफ सुथराई आहले सरिस्ते अपनाने लेई सिखलाई देने आस्तै। रामबन थवां आकाशवाणी संवाददाता अजयदीप सिंह नै जानकारी दिती ऐ जे खाद्य सुरक्षा मैहकमे नै रमजान गी दिखदे होई इस भेठा मुहिम गी व्यापक बनाई दिता ऐ। खाने-पीने आहली चीजें दी बिक्री करने आहलें थमां मैहकमे आसेआ 14 नमूने लैते गेन। इस बारै आकाशवाणी गी होर जानकारी दिंदे होई खाद्य सुरक्षा सरबंधी रामबन दे अधिकारी बलवीर सिंह होरें आखेआ।

<><><><><><>

ते हुन बाकि दिएं खबरें कन्ने श्रुति खजूरिया।

Centre Ban

केंद्री गृह मंत्री अमित शाह होरें आखेआ ऐ जे मुख्ये दी सुरक्षा ते शांति लेई खतरा पैदा करने आहले कुसै बी व्यक्ति जां फी संगठन गी बखशेया नेई जाग। ओहदे खलाफ सख्त कार्रवाई कीती जाग। अपने इक सोशल मीडिया हैंडल पर जम्मू-कश्मीर च 2 संगठनें पर लाई गेदी पाबंदी दी तस्दीक करदे होई उनें एह गल्ल आक्खी। सरकार नै दो आतंकवादी गुटें, अवामी एक्शन कमेटी (AAC) ते जम्मू-कश्मीर इतेहाद उल मुसलमीन (JKIM) पर पाबंदी लाई दिती ऐ। गृह मंत्रालय नै गैर कनूनी गतिविधिएं पर रोक लाने सरबन्धी कनूनी यू.ए.पी.ए 1967 तैहत इनें दौनें संगठनें गी गैर कनूनी घोषित करी दिता ऐ। केंद्र सरकार नै मीरवाइज उमर फारूक दी अगुवाई आहली अवामी एक्शन कमेटी ते मसरूर अब्बास अंसारी दी अगुवाई आहली जम्मू कश्मीर इतिहाद उल मुसलमीन पर 5 बरें दी पाबंदी लाई दिती ऐ। आकाशवाणी जम्मू संवाददाता दी रिपोर्ट मूजब गृह मंत्रालय नै 2 बक्ख-बक्ख अधिसूचनाएं च इनें संगठनें दे भारत दी संप्रभुता, अखंडता ते सुरक्षा गी खतरा पजाने आहली गतिविधिएं च शामिल होने दा हवाला दिंदे होई एह कार्रवाई कीती ऐ। अवामी एक्शन कमेटी ते ओदे नेताएं खलाफ कई सारे आपराधिक मामले दर्ज कीते गेन जिंदे च देशद्रोह, गैर कनूनी सभा, हिंसा भड़काने ते कथित तौर पर भारत सकार खिलाफ भाषण देने, चुनां दा बहिष्कार ते विरोध प्रदर्शन गी बढ़ावा देने दा आरोप शामिल ऐ।

<><><><><><>

DGP Poonch

जम्मू-कश्मीर पुलसा दे डरैक्टर जनरल नलिन प्रभात होरें जंदे रोज बन्ने आहले जिले पुंछ दा दौरा लाइयै सुरक्षा सरबन्धी तैयारिएं दा जायजा लैता। आकाशवाणी दे पुंछ संवाददाता अनुभव मिसरी मूजब, डीजीपी होरें इस दरान कब्ज़ा रेखा दे नेड़े स्थित सलोतरी ग्रां दा दौरा लाइयै उत्थे बने दे सुरक्षा हालात दी समीक्षा कीती। इस मौके उपपर जम्मू दे आईजीपी ते होर दुए सीनियर ऐहलकार बी उंदे कन्नै हे। डीजीपी होरें बन्ने पारा थमां घुसपैठ रोकने लेई सतर्कता च होर बाददा करने दी जरूरतें पर जोर पाया ते सुरक्षाबलें गी एह निर्देश दिते जे ओह सोहगे-सतर्क रौहन ते भविक्ख दे खतरें कन्नै निब्बड़ने लेई सख्त निगरानी बनाई रक्खन। डीजीपी प्रभात होरें

पुलसा दे सीनियर ऐहलकारें सने होरनें सुरक्षा अधिकारिएं कन्नै बैठक लाई ते बक्ख-बक्ख सुरक्षा एजेंसिएं बश्कार तालमेल बधाने दे निर्देश जारी कीते तांजे राश्ट्र-बरोधी तत्वे दे भैड़े मन्सूबे नाकाम कीते जाई सकन।

<><><><><><>